



Sanidade

CCOO denuncia que o Sergas destrúe as prazas de medicina de familia e «liquida a mobilidade» na atención primaria

O sindicato anuncia a súa saída do Consello Técnico de Atención Primaria por consideralo un órgano «inoperante e sen utilidade real»

20-10-2025.- A Federación de Sanidade de CCOO de Galicia denuncia que o Sergas eliminará todas as prazas de medicina de familia sen gardas obrigatorias e as converterá en prazas de facultativo ou facultativa especialista de atención primaria (FEAP), con gardas obrigatorias. A decisión, comunicada na última mesa sectorial, deixa sen opción de traslado este persoal «e impón por decreto condicións laborais máis duras, sen negociación nin respecto polos acordos vixentes», critica o sindicato.

CCOO lembra a súa oposición á creación da categoría de FEAP, prevista na Lei de medidas fiscais e administrativas de 2021, advertindo xa daquela que pretendía «burlar o dereito de mobilidade e impoñer gardas obrigatorias» incluso ao persoal que estaba exento por razón de idade —a partir dos 55 anos.

De feito, a Federación de Sanidade ten denunciadas as 77 prazas de FEAP incluídas no actual concurso de traslados, xa que moitas non son de difícil cobertura e están en zonas urbanas, «o que demostra a arbitrariedade e o engano con que se emprega esta figura», subliña o sindicato.

CCOO abandona o Consello Técnico de Atención Primaria

Por outra parte, CCOO comunica a súa saída do Consello Técnico de Atención Primaria —creado tras a folga de 2019— por consideralo un órgano «inoperante e sen utilidade real». O sindicato concentrará a súa acción na mesa sectorial e na defensa do persoal afectado por esta «nova agresión do Sergas», afirma.

Por último, canto á cobertura dos sábados pola mañá a partir de 2026, o Sergas anunciou que será asumida polo persoal dos PAC tras un cambio normativo. Porén, non concreta efectivos nin modelo asistencial, deixando todo ao criterio das xerencias. «Se o Sergas delega todas as decisións, podería prescindir da súa Dirección de Recursos Humanos, que evidencia unha falta total de planificación e responsabilidade», conclúe o sindicato.

+ Para máis información:

- Eva Vidal, responsable de Acción Sindical en Atención Primaria de CCOO-Sanidade: 649 216 328

Santiago de Compostela, 20 de outubro de 2025

GABINETE DE COMUNICACIÓN
Horario: luns a venres, 9-18 h
686 469 993 / 981 551 838 | prensa@galicia.ccoo.es
Máis información en: <http://www.ccoo.gal>